

東
華
續
錄

王先謙敬編

張式恭恭校

同治九年庚午春正月丁卯朔元旦節停止筵宴○庚午諭軍機大臣等李宗義奏疊次擊退撲河游匪一摺陝省延長宜川一帶土匪游勇嘯聚成羣因該處彫敝無可掠食遂思偷渡冰橋窺伺晉境上年十一月間匪蹤竄撲石皮渡十二月間又先後竄撲小灘及小梯巖雖經晉省防軍擊退難保不去而復來仍著李宗義檄飭李慶翱郭寶昌等督同在防各營嚴密堵扼毋稍疏虞賊股三次撲河晉兵或過河迎剿或隔岸堵禦而河西一帶何以未見陝兵會同夾擊著劉典嚴飭各營隨時跟蹤搜捕毋任匪徒游駛陝北地多山谷最易藏奸若不及早設法搜捕殲除一俟賊股一

日不盡晉防終難解嚴糜餉老師將成不了之局左宗棠劉典務當悉心商酌妥籌辦法迅將各股游匪盡數埽除毋得日久因循致釀後患將此由五百里各諭令知之○廣湖北安陸縣學額三名利川二名○癸酉諭軍機大臣等劉嶽昭岑毓英奏官軍肅清附省土堆餘匪並攻克祿豐縣城一摺土堆逆匪知官軍四面合圍聚黨抗拒經劉嶽昭等會同馬如龍督飭各軍攻破前層賊柵生擒逆首馬得良等多名餘匪死踞各村屋內官軍用火圍燒乘勢殺賊殆盡當將土堆村堡全行克復附省地面一律肅清其祿豐縣城踞匪亦經練目丁同義約會何秀林等軍內外夾擊紛紛乞降逆首劉和等被獲正法該縣城池亦即收復剿辦均屬奮勉逆首劉城米映山日久稽誅此次已否殲斃仍著該督等嚴飭各路文武確查實在下落毋任倖逃法網見在滇垣附近一帶已無

賊蹤卽著劉嶽昭岑毓英分督馬忠等軍規復澂江新興及東南
竹園館驛等處一面檄飭楊玉科等各率所部將姚州楚雄等府
州縣城次第攻取用竟全功將此由五百里各諭令知之○甲戌
諭軍機大臣等金順奏勦辦援賊獲勝攻克賊寨情形一摺王家
疇踞匪壘經官軍圍剿上年十二月間陝回趙五阿渾等糾集大
股援應經金順會同張曜督軍迎勦奮勇擊敗殲斃賊匪數千人
逆酋趙五阿渾等亦經擒斬並將馬汰納洪兩寨攻破斃賊甚多
金順勇往督戰致手受刀傷見在曾否平復實深廑繫著發去內
府如意拔毒散二料以資調理北路平羅縣屬黃渠橋等處見有
賊騎紛擾意圖鈔截糧運且該處距磴口一帶不遠尤應嚴密防
範著金順會同張曜飭令常福等實力接剿以清後路王家疇賊
匪困守已久見在外援既斷卽當相機圍剿力籌攻拔陝回雖經

南遁難保不復思北竄冀圖援應劉松山近日攻剿金積堡情形若何該提督駐軍處所踞甯夏不遠金運昌一軍亦早與劉松山合隊著左宗棠飭令彼此聯絡如甯郡賊勢較重卽當分兵前往會合金順張曜等剿辦以資得力並著左宗棠嚴飭北路各軍探蹤截剿毋任陝回紛紛北竄致多牽掣將此由六百里各諭令知之○予甘肅陣亡遊擊丁得勝祭葬世職○乙亥以孟春時享

太廟 上前期親詣行禮○丁丑諭軍機大臣等左宗棠穆圖善奏遵旨裁併營勇分段布置並穆圖善奏擬將常順等馬隊帶赴甯夏各摺片甘肅秦鞏一帶分駐各營經左宗棠飭令歸併其省城附近營勇由穆圖善分別裁併再由左宗棠派員點驗酌量遣留著左宗棠等認真簡閱應裁撤者卽行裁撤其挑選各營責令分段防守務使兵歸實用餉不虛糜裁汰各營勇丁卽著左宗棠

安籌資遣回籍毋任滋事王仁和所統懷義各營並著左宗棠另籌安插俾免失所江蘇等省部撥穆圖善軍餉銀兩已有旨自本年正月爲始改解西征糧臺支發所有副都統雙福等新調馬隊月餉著左宗棠卽飭袁保恆按月接濟其江甯月協甯夏餉銀一萬兩仍歸穆圖善收發爲甯夏各軍之用將來卽由該將軍覈實造報以免輻輳副都統常順等所統吉林黑龍江各起馬隊並該將軍原立圍隊一營均准穆圖善於出省時帶赴甯夏以資得力其餘各營步隊如須挑選帶往由該將軍酌度辦理左宗棠仍遵疊次諭旨剋期前進抑或酌派妥員馳往接替毋稍延緩至北路甯靈南路鞏秦軍務如何月餘未據該大臣奏報戰事著嚴密布置妥慎進取著隨時具奏以慰廑繫將此由五百里各諭令知之

○戊寅諭軍機大臣等文麟景廉奏肅州已撫回匪仍行出關擾

害並敦煌玉門稟報回逆滋擾情形各摺片據稱肅州回匪經成祿收撫後仍不時糾眾出關搶殺行旅擾害地方各路防兵因該回持有肅州鎮道傳牌印文不敢盤詰以致該回肆行無忌上年九十月間疊在紅柳園大泉等處搶劫軍糧殺害押運官弁又攻破踴寶堡城橋灣等處任意焚掠其成祿派出之回員李進三等復在敦煌玉門境內搜索糧石搶殺橫行關外民不聊生大局岌岌可慮等語回匪狼子野心非約束嚴明斷難日久安帖本日已諭令成祿將回員李進三迅卽撤回惟肅州已撫之回不能設法彈壓則回民積仇愈深勢將變生不測關外大局不堪設想著左宗棠迅派妥員馳往肅州查明實在情節嚴飭該鎮道派兵彈壓力圖補救並約束回眾毋再給文出關前諭成祿將所部勇丁嚴加裁汰奏聞聽候諭旨迄今未據覆奏何以此時忽派員在各屬

索糧滋事著該大臣確查成祿近日情形如帶兵不能得力徒事
騷擾地方卽行據實奏參楊占鼃帶兵如何亦著一併查明具奏
毋稍徇隱至關外久遭回逆蹂躪幾至不可收拾烏魯木齊等處
一片賊氛巴里坤哈密二城僅存時有防不勝防之勢儻日久大
兵不能出關巴哈二城力難撐拄其患不可勝言成祿帶兵如果
不能得力關外應如何布置有無兵勇可以抽撥揀派得力大員
先行統帶出關駐紮巴哈二城扼要之處藉壯聲威使回逆不敢
肆行窺伺著左宗棠統籌全局隨時具奏以慰廑繫竇型一員前
據穆圖善奏據總兵陶生林稟請暫護安肅道篆當因該員資望
太輕恐難勝任諭令左宗棠隨時察看並著恪遵前旨迅派委員
前往接署毋稍遷就文麟等原摺片二件均著鈔給閱看將此由
六百里諭令知之○諭文麟景廉奏覆陳擊退竄匪情形酌畱防

兵軍火暨肅州回逆竄擾各摺片據稱前次西逆竄撲哈密文麟等曾派撥兵勇在二三四五等堡及柳樹泉沙棗泉等處疊次痛剿該逆始由小南路瞭墩一帶遁去並未竄入坤境何瑄來咨亦稱親赴草打坡紮營並撥隊在山南沙棗泉等偵探旋因賊匪已被哈密官兵擊敗西遁撤隊回城等語是此股賊匪並非何瑄先在沙棗泉擊敗哈密兵勇始到該總兵前奏情形殊爲失實嗣後巴哈兩城軍務伊勒屯務當飭令何瑄與文麟等悉心酌辦毋得稍有參差致彼此各存意見其應行具奏事宜著會同伊勒屯列銜入告何瑄不得率行單銜具奏哈密防剿尙在喫緊若將駐防各營全調回坤難資分布文麟等擬於漢營官兵四百餘名內酌畱二百名仍歸副將趙萬海等管帶一面飭令該副將設營招兵俟新兵募練已成再將該官兵全數撤回卽著照所請辦理巴城

代鋪哈密擡礮四十桿尙未據何瑄解到見在哈密需用甚急准文麟等於防哈密營官兵軍火內截畱擡礮四十桿抵撥前數以資應用卽著何瑄飭令趙萬海就近照數分撥肅州就撫回匪不時出關擾害各路防兵因該回持有鎮道印文不敢盤詰以致該匪肆行無忌疊次搶劫軍糧殺害官弁本日已諭左宗棠派員往查嚴飭該鎮道督兵彈壓著文麟等曉諭各該處戶民如有回眾滋事無論有無印文是否貿易卽行格殺勿論以杜紛擾成祿派出之同員李進三等見在敦煌等處亦有滋擾情事著迅速撤回毋令貽害地方前諭成祿將見有兵勇汰弱畱強覈定數目迅速奏聞聽候諭旨迄今數月之久未據該提督奏報著卽詳細據實具奏不得任意遲延將此由六百里諭知文麟景廉成祿伊勒屯並傳諭何瑄知之○予甘肅被戕知縣彭煦祭葬世職○己卯諭

軍機大臣等劉典奏覆陳籌辦北山一帶情形暨定邊失守各摺
片陝北地本瘠苦被兵日久兼又密邇寇氛自應加意彈壓撫綏
消弭隱害據劉典陳奏各情是該處人民稀少田地多荒情形實
爲可憫該署撫仍當懷遵前旨慎選牧令與小民休養生息以期
漸次復業至安插降眾賑濟難民雖已辦有頭緒尤當認真經理
不可敷衍了事逃勇勾引土匪滋擾地方爲害不淺著卽嚴飭成
定康等密速捕拏盡法懲治毋令日久滋蔓卓勝軍逃勇甚多漫
無紀律殊堪痛恨著左宗棠李宗羲分飭金運昌郭寶昌各將所
部加意約束以肅營規遇有潛逃勇丁立即盡數查拏懲辦此外
各營勇丁亦難保無私自潰逃者並著左宗棠劉典檄飭各統帶
將領嚴密稽查隨時懲治北山所駐各營零星分布尙恐未能周
密仍著劉典悉心布置扼要設防藉資保衛定邊爲靈州後路劉

松山等軍攻剿正當喫緊若因該縣失守運道梗阻必致掣動全局且榆林以西並無重兵屯紮尤易滋擾宋慶一軍尙在神木一帶著李宗義就近檄令該提督分派兵勇趕往堵剿並著左宗棠迅撥勁旅立圖攻克劉典仍當籌調兵勇會同夾擊以遏狂氛此股賊匪恐竄邊外草地肆行奔突著定安先事防維嚴密布置定邊一帶本有金運昌畱防四營何時調赴前敵何以劉典並未知悉著左宗棠查明具奏榆林等處防守緊要卽著劉典督飭成定康等實力防剿毋稍大意將此由六百里各諭令知之○諭福濟榮全奏布倫托海裁隸科城請派大員會辦榮全奏懇繳伊犁將軍印信文碩奏起程赴京各一摺前因定界事宜改派奎昌科城料理需人諭令文碩毋庸來京見當海城新撤一切分遣安插事宜亟應次第舉辦奎昌一人勢恐應接不暇且節屆春融卽須前

往分界更難兼顧文碩著懷遵前旨毋庸來京無論行抵何處仍
卽折回科城會同奎昌將該城應辦事件認真經理福濟等所請
簡派大員赴科會辦之處著毋庸議榮全辦理俄國交界收集索
倫等事雖已就緒恐尙有未盡事宜隨時酌辦之處所有伊犁將
軍印信仍著榮全署理毋庸呈繳將此由六百里各諭令知之○
庚辰子安徽陣亡知縣劉景華祭葬世職○壬午左宗棠奏陝回
敗遁狄道後屢次出巢掠食均經官軍擊敗嗣據獲賊供稱陝回
馬正和等逆被剿窮蹙糧草缺乏潛遣人由金積堡至狄道嗾逆
目崔三禹得彥馬生彥白彥虎等股眾潛襲半箇城官軍營壘掠
取軍糧乘勢東犯以攻雷正綰等軍之背而解金積堡之圍十一
月二十九日申刻提督徐占彪調逆回馬步數千由狄道向安定
西北好麥川峴口秤鉤驛等處絡繹奔赴卽帶所部步隊三營會

商總兵裴忠朝率所部馬隊星夜馳奔巉口擊之一面布置安定城守楊世俊卽由紅土寨率所部馬隊各營馳赴巉口會剿是夜四鼓各營馬步抵巉口瞭見好麥川秤鉤驛及巉口迤東之張家莊等處火光徧野逆眾蜩集徐占彪率馬步分中左右三路猛攻巉口飭副將黃志元步隊橫出秤鉤驛以馬隊輔之楊世俊率張仲春楊德俊馬隊循山脊繞出秤鉤驛之前截賊歸路巉口之賊卽向北路魯家溝狂奔徐占彪躡殺四十餘里追至石峽灣收回巉口其秤鉤驛之賊分由好麥川會合內關營賊向西南折竄官軍疑其遁回狄道也遂收隊回安定是役共斃賊二百餘名生擒三十七名訊據擒賊供稱巉口竄出之賊爲崔三好麥川內關營竄出之賊爲禹得彥馬生彥白彥虎各股卽飛報陝安道黃鼎自靜甯出會甯截之十二月初一日黃鼎各營抵會甯迤北之郭城

驛逆回已由紅堡子向打拉城長流水一帶疾馳而東矣初三日五鼓提督周紹濂誦賊近半角城率隊迎擊賊已撲入半角城回堡周紹濂揮隊沿河截剿斃賊百餘名生擒二名官軍傷亡二十餘名半角城回堡西南二十里瀾泥溝段家溝爲陝回逆眷寄頓之所官軍前破李旺堡穆家潭回寨及打拉城大捷時陝回眷屬多已衝散逆首馬生彥之黨馬金倉收集就撫官軍以其中多老弱婦女釋之暫安插於西山瀾泥溝段家溝甘回莊寨兩月以來尙稱安謐至是突起應之周紹濂中營及所部右後兩營皆附半角城回堡北結營其右後兩營適因金積堡賊出竄北路馬家河灣一帶截阻官軍運道正派令會同副將桂錫楨馬隊分途接剿尙未收回老營賊至以中營及右後兩營所畱三成隊伍鏖戰敗賊然兵力過單賊陷半角城回堡不能遏也是日右後兩營聞

賊撲半角城恐老營有失急拔營馳回策應右營營官副將劉甫田率步隊親兵二十餘名薄暮趨程疾進行數里陷澗中適兩旁騎賊盡至劉甫田挺矛躍馬左右衝突刺斃悍賊多名卒以眾寡不敵立殞陣前比副將陳高華率右營隊伍至賊已遁矣乃整隊回營是夜後營營官參將毛正明率隊南進李廣園行三十里至王家團莊天色正明調距莊五里之高崖子有騎賊數百正圍攻民堡而東路糧車假道而北者絡繹於道當會同總兵王銘忠各督馬步馳赴高崖子擊賊賊駭而奔毛正明當分兵交王銘忠助守軍糧自率隊伍躡賊至半角城漏已四下矣初四日黎明周紹濂派毛正明陳高華督隊分中左右三路進攻半角城回堡一鼓克之斃賊二百餘名敗寇竄過河西段家溝等處薄暮官軍收隊回營臣前因半角城以北游騎剽掠糧運中梗檄提督丁賢發由

固原前進接剿正啟行開牛角城警報適至又加派道員魏光燾步隊副將銜儘先參將劉錦臣馬隊繼進飭提督左日升參將馮南斌所部防固原提督陳廣發所部防瓦亭節節護運前進續據北路諜報馬正和喊其黨安燕千餘眾出掠康馬頭一帶而段家溝踞賊初四五日以後人馬又忽增至數倍賊勢更張初六日魏光燾丁賢發馬步由固原鼓行而北初八日進李家瓜園是夜周紹濂所部分防黑城子李旺堡之前左兩營步隊護糧過王家團莊迤北十餘里之墩子溝園王銘忠調夏回馬柏森馬隊爲前導遇劫糧賊騎狂奔而來異常悍驚馬柏森眾寡不敵馬隊被賊衝散陣亡回勇六名前營營官總兵李良穆左營幫辦副將周玉林各以所部步隊結圓陣禦之輜糧居中外環刀矛槍礮騎賊六七百縱橫衝突十數次官軍屹立不動遇賊近則槍礮輪轟之賊中

人馬應聲而倒逆騎不得逞復喉步賊千餘猛撲陣前軍士皆死
死戰無不一以當十戈矛截刺終夜有聲步賊不敢近退入破堡
以叉子槍穴牆對擊騎賊則分起環繞更番不休李夏穆左肩被
賊槍子洞穿復裹創血戰軍士屹立一夜一晝勺水不入口相持
至初九日酉刻魏光燾丁賢發各帶所部馳至賊死傷已多復見
官軍大至狂遁而西官軍壓追十餘里齊抵半角城魏光燾丁賢
發直擣段家溝賊巢由川東進周紹濂由川西進賊悉眾越西山
遁走官軍乘勢將爛泥溝段家溝等處賊巢一律蕩平躡賊二十
餘里至峽口該逆由長流水西竄鹽茶各振旅而還計初八夜至
初十日各戰斃賊七八百名生擒八十餘名訊畢斬之拔出男婦
老弱百餘口兵勇傷亡五十餘名賊敗竄至鹽茶廳仍四出掠食
蔓延西南莎蘿堡鴟兒灣水淡溝一帶初十日黃鼎自會甯馳回

靜甯由硝河城黑城橫截而出十二日馳抵莎蘿堡東十餘里偵騎賊二三百正在圍攻甘回堡寨黃鼎揮馬隊掩擊之斃悍賊四五十名餘逆遁歸鹽茶黃鼎畱副將林定遠護輜重駐莎蘿堡自督馬隊趙行薄暮抵鴉兒灣十餘里距鹽茶五十餘里適騎賊數百正由鴉兒灣南竄飭副將黃虎臣縱馬隊橫截其腰斃賊二十餘名餘逆向鴉兒灣敗竄副將胡應芳怒馬直前躡近鴉兒灣四五里從閒道馳出忽悍騎數百圍偪而來胡應芳督隊迎敵正搏戰閒黃虎臣馬隊總兵韋占雄李玉春步隊從後蹙至立斃悍賊數十騎敗賊入鴉兒灣憑牆抗拒黃鼎乘月色微茫密派李玉春韋占雄挑壯士數十人倍道繞出鴉兒灣左右沿山縱火爲疑兵親督馬步直擣中路賊眾慌亂登時向西北潰走官軍三面鈔殺陣斬賊中悍目僞領員楊黑牛藍遇春等三十餘名二鼓就鴉兒

休息據擒賊供稱崔三已越鴉兒灣西南三十里趨老虎溝其
由鴉兒灣西北敗遁者禹得彥各股也黃鼎當飛飭林定遠帶隊
由莎蘿堡橫出老虎溝兜剿而前赴鴉兒灣合隊四鼓馬探報禹
得彥去而復來黃鼎警巡邏嚴守備以待忽西北角喊聲突起有
悍賊數十人撲近營壘黃鼎令軍士移燈滅火鎮靜以待潛遣都
司李洪超率銳卒數十人悄入賊中刀矛亂刺賊眾驚潰斬馘數
十名生擒三名據供禹得彥度官軍遠戰疲乏喉悍賊數百前來
劫營不料爲官軍所敗林定遠所部行近老虎溝已五鼓矣詎逆
回蟻聚各回莊催隊疾進掩其不備斃賊數十名餘逆向西南狂
遁天明收隊抵鴉兒灣黃鼎分兵扼鴉兒灣自督馬步進水淡溝
西安堡劉家井連日搜剿而西該逆百十成羣彌漫山谷見官兵
卽遁疲驟病馬拋棄滿途據賊中逃出難民供稱禹得彥十三日

四鼓轉鴉兒灣之後連夜向紅堡子遁郭城驛分股由中灘出打拉城竄靖遠而西賊糧缺乏大半煮牛皮茹草子爲食黃鼎正擬分路窮追詎崔三一股復由大宏溝新營川竄右武營可南走硝河城以達靜甯當收隊回防道出李家堡清查南八營就撫甘回馬繼祖馬其邦李子昌馬海奇等五百餘家勒繳馬械誅從賊之馬宗德等三名總計鹽茶之役共斃賊三百餘名擒獲數十名十五日楊世俊徐占彪瞭見郭城驛一帶炊煙四起料東竄之賊必經官軍截剿而西圖竄囓口歸狄道當分馬步數路伏張家莊左右破堡約以火箭爲號四鼓賊眾蠭集各路官軍馬步突起號鼓齊鳴該逆倉皇鋌走張仲春楊德俊總兵殷華廷馬隊亦自紅土窯率隊出張家莊助剿分途西追三十里至馬家堡沿途斃賊數百名生擒八十餘名十六日收隊回張家莊據生擒賊供此股卽

馬生彥禹得彥崔三馬金倉股眾連日經官軍追剿分三路西趨
崔禹兩逆之黨悍目偽領員楊士明馬祿已斃於陣訊畢斬之同
時河州回目馬占鼇等亦喊逆黨由大營川好麥川兩路東出曉
口車道嶺迎護陝回賊眷楊世俊徐占彪會商官軍馬隊出大營
川步隊出好麥川乘該逆喘息未定擊之是夜月明如晝楊世俊
督馬隊由張家莊北原安家墩出車道嶺瞭見西竄敗賊漫山徧
野楊世俊縱隊擊之躡至甘草店檢斬極多餘眾向狄道遁逸十
七日黎明大營川忽橫出悍騎數百楊世俊知爲狄河援賊也飭
馬隊分中左右三路迎敵該逆下馬挺矛死鬪官軍亦分枝改騎
爲步仍以馬隊鈔大營川之後楊世俊督殷華廷率隊衝其前斬
悍賊數十名逆勢披靡紛紛潰散官軍乘勢追至高崖斃賊百餘
名該逆狂奔而西未刻收隊紮車道嶺其好麥川一路徐占彪於

十六日二鼓率步隊前行抵杜家岔溝該逆卒不及防徐占彪滾隊撲上斃賊三百餘名追至漫窪正收隊東向山左右突出馬步賊四面包來副將何玉超攻其左黃志元攻其右徐占彪督隊居中槍礮環轟賊不少卻徐占彪揮戈突陣手帶矛傷勇士如牆而進併力壓之斃賊多名賊眾大敗官軍縱追十餘里該逆擁擠不前墜崖落堊者不計其數薄暮收隊距巉口迤西六十里之蒲家堡駐紮二鼓該逆馬步復折而東連夜撲犯官軍營壘數次均經徐占彪督隊擊敗十八日黎明會合楊世俊徧搜山谷斬獲殘匪多名口暮收回巉口道員李耀南先於十六日辰刻由紅土窯整隊西行十七日五鼓抵巉口偵禹馬等逆已經徐占彪楊世俊擊敗而西崔三後股又將偷越巉口李耀南率同總兵周顯明蕭賞謙副將盛照魁等步隊銜枚疾進截擊於巉口二十里之鹽溝地

勢險隘不容方駕逆眾憑卡死拒官軍火器環施刀矛繼進賊勢不支紛紛敗北轟斃刺斃跌斃者不少餘逆越魯家溝北奔已刻官軍收隊回巉口休息十八日窮搜而北崔逆已向郭城驛南趨各軍十九日均回防所諜報崔逆十八日竄踞會甯迤南二十里之康家堡黃鼎畱防會甯之總兵趙興隆帶所部七成隊潛師夜起襲之斃賊約三百名擒斬十餘名餘逆循豹子川南竄紅土窯李耀南隨楊世俊率隊出安定會剿十九日酉刻先後抵紅土窯設伏以待二十日三鼓賊騎逾紅土窯北原俯矚官軍官軍佯爲不知四鼓崔逆率千餘騎從花尖堡越李家河楊世俊李耀南馬步分道鈔擊該逆四面被創截成數起尾賊百餘騎折而北遁盛照魁楊德俊裴思朝馬步邀截之一股數十騎由花尖堡遁麻子川周炳榮馬隊聚殲之一股百餘騎由李家河奔李家灣總兵黃

儲寶追剿於後總兵殷華廷等攔截於前無一脫者崔三率七百騎死黨越李家河趨王家岔楊世俊李耀南督馬步跟蹤壓追張仲春馬隊復來麻子川東西兩原飛駛通安驛邀其去路該逆拚死抵禦經官軍槍轟矛刺而殞者不下二三百名崔三率數十騎狂遁而西殿後數百騎經各路馬步合勢圍剿陣斬偽副元帥馬得海擒崔三之叔崔官騎賊悉就誅戮得逸出者不過二十騎耳步隊追至馬家河馬隊躍至皋陶河楊世俊復挑數十騎窮追崔逆弗及戍刻回安定防所訊據賊供崔三不料官軍回防如是之速圖由紅土窯偷竄不料正遇官軍遂至大敗計十二月十六日十七十八二十日之戰斃賊實二千數百名生擒三百數十名其逆眷之填溝壑者無算臣惟金積堡陝回被剿窮蹙其勾引南竄狄道諸逆劫糧阻運事在意中此次崔禹馬等逆悉銳北竄勢頗

狼狽一挫於周紹濂半角黑城諸戰再挫於黃鼎鵠兒灣老虎溝諸戰其敗歸也復爲楊世俊徐占彪等所截統計前後擒斬之數實逾三千而墜崖落澗餓斃自盡不與焉諸軍於歲暮嚴寒之時馳驅於水枯草絕之地卒能踊躍用命痛挫兇鋒在事出力員弁勇丁可否擇尤酌保以示鼓勵之處出自逾格 鴻施又奏甘南鞏秦所屬地方當河狄逆回出竄衝要上年九月二十五至十月初二等日經補用道湯聘珍涼州鎮總兵傅先宗各軍扼剿竄回於西和禮縣一帶折遁狄河兇鋒稍斂然句結陝回崔三禹得彥各股敗寇仍不時覬覦南路牽綴官軍嗣 臣宗棠奏派周開錫令湯聘珍督同提督梅開泰所部扼漳縣而營傅先宗駐軍甯遠分枝由徽城出西和禮縣節節技剿作爲游剿之師十一月二十二日賊眾擾及西和縣附近地方攻撲民堡伺提督丁桂智馬隊將

至聞風宵遁十二月初一日丁桂智追賊至禮縣屬之巖城訶賊結寨於石東溝距巖城三十里初二日黎明丁桂智分馬隊繞出賊前派副將田大伏兵於石東溝西南要隘親督知府程光第直搗中堅賊方排谷口而陣官軍併力壓下賊勢不支踰溝越嶺而遁適官軍馬隊迎擊其前田大所部橫擊其中丁桂智程光第率隊張左右翼從後蹙之賊眾大敗悉銳直前鈔殺躡二十餘里斃賊三百餘名生擒三十八名薄暮收隊就地安營訶零股賊眾數百嘯聚敗寇回踞石東溝十餘里蔡家山陶坪莊意圖抗拒詰朝丁桂智戒各營秣馬蓐食整隊齊進察看蔡家山懸崖峻坂鳥道螺旋賊踞其中分悍黨百餘憑隘口以拒官軍丁桂智察其未可以力攻而下挑壯士改騎爲步踰山脊壓下以掣其勢田大程光第催隊從峽口猛進賊正恃險穩抗不虞官軍徑搗其巢也返顧

慌亂號叫狂奔墜崖殞者三四百人馬隊分途截殺二百餘名生擒六十名巢賊數百無脫免者同時甯遠西南包家莊雙碌柱亦有賊蹤竄擾十二月初一日傅先宗派提督高月桂總兵蘇家良馬步馳剿初二日抵包家莊調賊翕聚南山蟠結未動初三日黎明官軍步隊伏山左右馬隊分支鈔賊歸路以一枝挑戰該逆從山峽中衝出異常獷悍官軍馬隊且戰且走誘其離巢漸遠步隊從左右攢矛競進槍礮環施馬隊從後夾擊之斃賊四百餘名餘逆六七十名敗向雙碌柱合股官軍乘勝奮巢一鼓而克斃賊三百名生擒十四名初八日湯聘珍調漳縣三岔以西逆眾千餘騎麇集比令提督梅開泰挑銳卒五六百派副將楊永成常遠藻領之乘黑夜砍賊營漏三下官軍潛入賊巢揮刀亂砍夾以火器該逆自夢中驚起駭怖失措官軍乘機掩殺斃賊六七十名敗賊

逸汪家衙初九日黎明梅開泰督馬隊躡至王家河出石灰溝口沿途斬馘極多賊屍盈野餘逆遁入狄道臣維甘南諸軍裁併之後壁壘新立士氣奮興自十二月初一至初九日擒斬賊數不下二千餘名實足壯軍威而寒賊膽又奏再臣於陝境肅清後率師規隴所部各軍北路直偪金積堡中路直達皋蘭南路直臨狄道諸軍西進陝省毗連之地自延榆綏迤東出鄜洛邠長越汧隴而南綿亘千數百里均與甘省唇齒相依尤關後路運道見在金積堡陝回被剿窮蹙糧草缺乏游騎伺虛掠食覲覲東路兵至則去兵去則來飄忽靡定陝西各營或偪賊巢或護運道或搜剿游匪本省兵分力單不敷調撥查甘肅甘州提督馬德昭所統豫軍駐紮潼關晉溝素稱得力目下豫省防務已鬆臣擬調赴陝西或以全軍移駐或酌帶八成隊伍前來扼紮三原地方居中策應鎮壓

陝還仍可爲豫省屏蔽該軍月餉向由河南支發今旣由豫入關嗣後月餉仍應由河南籌解劃抵河南欠解甘肅協餉於事體亦爲允當於時局大有裨益除咨馬德昭並河南撫臣外謹附片具陳又奏正拜摺聞忽接據署延榆綏道成定康馳報八年十二月二十日夜回逆襲陷定邊縣城前壽春鎮總兵蘇如松豫望城夏回馬柏森稟報相同查陝西自甯條梁以西安邊定邊花馬池一帶爲劉松山全軍後路餉道攸關劉松山進剿靈州臣因餉道堪虞飭金運昌於進兵時畱營防護嗣金運昌因前敵兵力尙軍將甯條梁安邊定邊各營調赴金積堡蓋冀郭寶昌馬步三營可以續進填紮不知郭寶昌時已遵旨赴晉也自此定邊空虛劉松山金運昌軍餉軍火軍糧皆需派馬步隊前赴甯條梁迎護此次賊乘虛襲陷縣城劉松山金運昌自必派隊馳援然由金積堡靈州

至定邊傍河岸迤北而東踰花馬池計程三百數十里往返奔赴
兵力過勞而前敵之兵見少見屈春令解凍伊邇山西冬防已將
解嚴可否請旨飭山西撫臣令郭寶昌於冰橋銷化後迅率所部
馬步三營由綏德馳赴定邊花馬池一帶肅清劉松山金運昌兩
軍餉道俾免後顧之虞上諭軍機大臣等河狄逆回句結陝回
崔三禹得彥等股竄擾禮縣甯遠一帶經傅先宗等疊次截擊擒
斬賊匪不下二千餘名餘賊遁回狄道剿辦尙爲得手所有在事
出力員弁勇丁著准其擇尤保奏金積堡陝回被剿窮蹙復句引
崔禹等逆悉銳北趨勢頗猖獗周紹濂黃鼎等於半角城黑城鴉
兒灣老虎溝等處前後截剿斃賊三千餘名在事員弁勇丁尙屬
出力並准左宗棠擇尤保奏陝回馬鎮和等堅守金積堡巢穴屢
攻未下該逆被困日久時思句引各股逆匪劫糧阻運牽掣官軍

冀圖一逞見在敗匪雖已遠遁仍恐乘間分竄著左宗棠等督飭南路中路各軍確探賊蹤聯絡截擊使金積堡之賊勢孤援絕方可力圖攻拔陝西自甯條梁至花馬池一帶爲劉松山全軍後路糧運所經何以金運昌遽將畱防各營調赴前敵詎不料及逆回詭計多端一經繞截後路全局卽虞掣動見在定邊旣被襲陷運道設有梗阻關繫非輕郭寶昌此時協防晉省河岸正當喫緊且所帶親軍人數無多不必令其馳赴定邊著左宗棠派隊馳援並責成劉松山金運昌迅圖克攻肅清後路一面飛咨陝省防軍合力夾擊以杜賊蹤竄擾其前敵各軍仍當飭令穩慎進攻毋稍鬆勁另片奏請調馬德昭帶兵赴陝防剿已諭李鶴年酌量調撥矣將此由六百里各諭令知之○左宗棠奏據黃鼎稟稱張貴所部降眾大都籍隸平涼鹽固隆靜會甯各屬逐日點驗查詢籍隸靜

甯莊浪有家可歸者五百餘名資遣各歸各籍交鄉約管束其籍隸平涼固原隆德會甯者多因遭亂無家可歸交平涼府擇地安插此外尙有川湖淮豫人從軍被脅者二百餘名餘皆鹽茶廳人年力精壯同籍無以謀生恐仍流而爲匪當挑補該軍新捷四營勇夫以資鈐束又挑應壯戰馬一百二十五匹附入該軍馬隊而中路匪案始結臣維張貴卽剛八本鹽茶廳民人粗蠶而有膂力始藉報復兄仇爲名糾聚不過數十人嗣因年荒糧貴各處匪徒而附和遂至嘯聚萬餘居然置械立幟號稱義旅不肖官紳始圖倚其勢以自衛繼且假其勢以擾民爲之勒兵費派軍糧有不應者破其堡寨擄其婦女甚至非刑拷掠搶殺焚燒利所有而食其餘所爲殆無人理其黨之最兇惡者爲僞統領侯得應僞營哨官王璧柳林張起運樊糴青楊寶山趙銀秀柴滿桂張雄碓子楊潤

安王魁楊兆魁等張貴就撫之後諸兇仍散匿各處疊經各營及地方官設法搜拏始將元惡侯得應王璧及各犯一律獲到先後押解臣營逐一提犯嚴訊該犯等罪狀實浮於張貴質之本地

士民無不異口同聲其王璧一犯曾署隆德營外委而破隆德縣城戕害守備王萬順一家四口者卽該犯也訊畢將侯得應王璧凌遲處死以申國法而洩民憤其柳林等概予斬梟惟張貴一犯暫尙留黃鼎營勒捕餘匪且聽其獲犯自贖報聞○予甘肅陣亡副將劉甫田遊擊杜敬仲等祭葬世職○癸未神武門內敬事房木庫火詔修省停止是日廷臣筵宴○調英元爲倉場侍郎以達慶爲刑部右侍郎由左副都御史遷○甲申諭軍機大臣等前因撥償俄

國諾海牲畜銀兩令福濟榮全查明辦理茲據總理各國事務衙門奏稱該將軍等咨明前撥之款計不敷銀四千六百兩並請將

三年銀數提前二年撥解覈與前十萬數千之款仍屬相符等語
此項銀兩既據該將軍等查明確數自應提前撥償以省軫軫著
李宗義轉飭該藩司於山西應解京餉內同治九年撥銀三萬八
千七百兩十年撥銀四萬八千五百兩十一年撥銀一萬九千四
百兩由歸綏道轉解每年限於三月內起程四月到烏里雅蘇台
由福濟移交榮全收納該署將軍卽於銀兩解到後派員運往恰
克圖歸還以清款目原摺均著鈔給閱看將此由五百里各諭令
知之○諭禁崇文門巡役訛索○丙戌諭軍機大臣等李鴻章奏
籌辦黔事大略情形請飭川省裁軍騰餉暨酌撥洋稅銀兩各摺
片黔省苗氛肆擾川楚各軍未能奏績特命李鴻章前往督辦底
定黔疆該省軍事棘手朝廷亦所深悉此次該督籌陳大略詳述
三難足見遠慮深謀老成持重李鴻章公忠體國必能力任其難

早靖西南邊患所有酌調舊部籌運糧餉各事宜均著該督相度
機宜悉心籌布朝廷不爲遙制也黔餉勢須藉資於川省營勇過
多積欠又鉅見在唐友耕所部六千餘名已由滇省撤回周達武
所部八千餘名又經抽調腹地著崇實吳棠迅將前項不出剿之
軍並其餘不能得力零星各營籌款酌補欠餉逐漸裁汰騰出餉
項以贍征軍並將裁贖餉需儘力分濟援黔各營及酌撥滇黔協
餉不准稍存膜視仍隨時知照李鴻章酌度辦理至李鴻章督辦
黔事必得大宗的餉方足以資飽騰著馬新貽丁日昌於江海關
應解淮軍額餉二萬兩外按月扣撥該關四成洋稅二萬兩六成
洋稅一萬兩李瀚章郭柏蔭於江漢關按月撥解四成洋稅二萬
兩六成洋稅三萬兩丁寶楨按月協撥銀二萬兩均自本年二月
分起如數籌撥按月委解金陵軍需局轉解李鴻章後路糧臺該

督撫等均能顧全大局諒不至稍有遲誤將此由六百里各諭令知之○己丑諭內閣朕奉 慈安皇太后 慈禧皇太后懿旨三載考績爲國家激揚大典中外滿漢諸臣有能盡心職守懋著勤勞者允宜特加甄敘以示優眷茲當京察屆期吏部開單題請詳加披閱恭親王首贊樞廷於今九年夙夜靖共於一切行政用人虛心匡弼鉅細靡遺深資夾輔著交宗人府從優議敘吏部尙書文祥戶部尙書寶鋆都察院左都御史沈桂芬戶部右侍郎李鴻藻同心竭贊克愼克勤均著交部議敘大學士官文厯任封圻勤勞夙著大學士直隸總督曾國藩老成宿望表率羣僚調任畿疆盡心民事協辦大學士湖廣總督李鴻章韜略優長懋昭勲績陝甘總督左宗棠宣力巖疆不辭勞瘁均著交部從優議敘餘著照舊供職○庚寅諭軍機大臣等劉典奏回逆分竄陝境情形暨擊

退竄涇賊股收復定邊各摺片同匪竄擾陝境攻陷定邊襲陷定
安賊蹤飄忽肆行奔突左宗棠回援之軍總落賊後該督撫等同
辦一事何以彼此不相聯絡致誤事機見在瓦窯鋪踞匪勢甚兇
悍慶陽之賊又復竄至三水繞竄永樂店窺伺省城且尙有陳瞎
子一股亦思竄陝定邊之賊攻撲甯條梁鎮靖堡等處並有另股
賊匪滋擾希圖下竄賊蹤紛至沓來幾至不可收拾安定定邊雖
據奏稱收復殊不足恃著卽將實在情形查明具奏左宗棠入甘
後自應酌畱重兵力顧後路劉松山金運昌所部本係分紮花定
何以不遵札飭竟行相繼前進雷正綰周蘭亭張福齊簡敬臨等
四軍左宗棠止令其剿辦半角城等處踞逆何以道員曾傳理竟
令各軍進發以致回逆乘虛竄入各軍進止自由無所約束該大
臣當嚴申號令立將貽誤各員查明參奏以示懲儆馬德昭一軍

前據左宗棠奏調已諭李鶴年飭令該提督帶所部扼紮三原該軍抵陝後著劉典會商左宗棠妥籌調度陝省防兵過單左宗棠務當抽撥勁旅回顧陝疆迅將分竄各匪盡數殲除毋稍鬆勁劉典仍當嚴飭陳照臺成光裕等分投堵剿以遏狂氛不得徒事張皇毫無展布陝事一日不靖卽蔣志章抵任劉典亦不得置身事外著卽振刷精神亟圖補救毋得因循諉卸自干咎戾安定瓦窯鋪一帶距晉非遙見在河冰未泮李宗羲當督飭李慶翱等嚴密防堵毋稍疏忽豫師前已賞給副都統銜簡放西甯辦事大臣著左宗棠知照豫師迅赴新任並將應辦事宜妥爲經理以副委任將此由六百里諭令知之○予雲南陣亡遊擊熊財興祭葬世職○辛卯諭軍機大臣等總理各國事務衙門奏俄國自立牌博請飭查辦一摺瑪呢圖嘎圖勒漢至哈巴爾阿蘇一帶俄國分界事

宜前因布倫托海裁撤統歸科布多大臣辦理當經改派奎昌前往會辦茲據該衙門奏稱見在接俄使照會哈巴爾阿蘇一帶該國已自行分界其所立牌博是否均在同治三年所立紅綫界外請飭查辦等語著奎昌迅卽按照圖冊查勘明確繪圖貼說詳細奏聞妥慎辦理以副委任昨因文碩到科需時諭令榮全前往代辦卽著榮全懍遵前旨迅速前往俟文碩到後再回烏城仍著福濟會同妥籌以重邊防原摺一件及照會二件均著鈔給閱看將此由六百里各諭令知之○壬辰諭軍機大臣等定安奏嵩武軍會拔賊壘暨剿辦北路竄匪烏爾圖那遜所部剿賊獲勝並豫籌南北兩路防剿情形各摺片王家瞳莊回逆因官軍攻克馬汰納洪兩寨後負嵎死守經金順張曜會督各軍分路進剿先將南面東面各壘攻克該逆復向南直撲楊春祥追賊陣亡孫金彪等帶

隊截殺又平毀附巢壘卡四座塔子口踞逆亦經亮山剿敗其遁踞大風口等處之賊常福分兵夾攻殺斃甚夥見在王家疇莊附近賊壘均經平毀該逆僅恃此老巢不難乘機攻取仍著該將軍迅咨金順張曜各督所部晝夜環攻爲埽穴擒渠之計鄂托克旗代清召一帶賊匪滋擾常福在纏金東南地方追剿獲勝賊復遠颺據獲賊供有由金積堡偷竄出邊打糧之說是邊外地方遼闊匪蹤出沒靡常該將軍仍當札飭烏爾圖那遜督率常福各隊確探賊蹤嚴加防範不准稍有疏虞據奏回逆分路滋擾歸綏一帶亦應兩路兼防已屬宋慶派令蔣東才援應榆林並飭達爾濟等分投協剿所籌均屬妥協卽著檄令達爾濟會合各軍相機追剿總期聲勢聯絡力殄賊氛昨據劉典奏稱定邊業已收復惟瓦窯鋪踞匪勢甚兇悍該處逼近陝疆難保不圖北竄該將軍務須勒

加偵探妥籌防守其沿河包薩托清等處並著嚴飭馬陞會同京津隊伍加意巡防毋涉疏懈將此由五百里諭令知之○甲午諭軍機大臣等李鶴年奏潼關防務緊要馬德昭一軍未能西進李宗義奏陝回肆擾逼近蒲州布置河防各等語回逆竄擾陝西長武縣境旋竄渭南縣之倉頭孝義鎮等處已在渭河北岸安設帳房咸陽涇陽三原高陵蒲城均有賊蹤大荔縣所屬之羌白潘驛亦有邊馬是竄陝回匪由西而東幾於徧地賊氛劉典前奏慶陽之賊竄至三水繞竄永樂店窺伺省城何以不卽派兵截剿致令賊勢如此蔓延著劉典迅撥勁旅探蹤攔擊務將此股匪眾就地殲除毋令紛竄左宗棠迅卽抽撥兵勇回顧陝疆不得置之不問並著懷遵前旨查明後路防軍何以悉赴前敵致賊匪乘虛擾陝掣動全局之處據實參奏至此股賊首是否卽係馬正剛劉典前

奏另有陳瞎子一股續圖竄陝曾否與此股合併著左宗棠劉典
確查兼將北路瓦窯鋪之賊趕籌撲滅倉頭等處距潼關僅百餘
里馬德昭一軍若移紮三原轉出賊之西面關門左近撤去藩籬
於晉豫大局均有關繫著卽照李鶴年所議馬德昭暫緩西進責
令將潼關防務妥籌兼顧一面抽調精壯馳赴渭河相機援剿至
添募新軍卽著李鶴年趕緊募練以期有備無患渭南大荔距蒲
州所屬甚近李宗義已飭李慶翱先撥礮船兩營馳赴下游擇要
嚴防並調上游一營趕赴蒲州堵禦復將各渡口船隻盡數提至
東岸所籌均尙嚴密卽著督飭在事員弁實力巡防毋稍鬆勁安
定瓦窯鋪賊匪尙未埽除鄉吉以上河防亦不可稍涉大意毋得
顧此失彼將此由六百里各諭令知之○乙未飭各省迅解成祿
軍餉○丙申左宗棠奏竊陝回逆目陳林馬正和余彥祿等折竄

金積堡自上年十一月十三日起疊經官軍痛創併入金積東西各堡與甘回雜居勢甚衰蹙續准劉松山牘稱該逆於十一月十四日夜仍就波浪渠堰修築長牆一道較前更堅十五夜二鼓訶賊出金積堡西北馬家灘回寨運取馬草劉松山乘月掩襲分支循東北進波浪渠長牆直擣賊巢自督馬步疾馳提督金運昌營前合隊四鼓逆眾甫護牲畜出西北劉松山金運昌會商以步軍列隊居後伺巢賊出相機應之馬隊張左右翼一趨西路一趨北路賊見官軍大至駭而奔馬隊馳出賊後邀其歸路忽金積堡東西兩面角聲四起援賊遽擁而至金運昌步隊迤西斜出劉松山步隊分三路排列正西一面嚴陣以待步賊且前且卻正相持間官軍馬隊已敗賊於秦壩關從步軍陣後鈔出賊之左右劉松山搥鼓急進各營猛力薄之槍礮雷轟刀矛如牆而進斃馬步悍賊

甚夥賊勢披靡向金積堡以西各寨狂遁官軍馬步緊追至寨根敗賊有奔入寨內者有進寨不及越金積堡壕內逸出者其東北一路又經提督蕭章開道員劉錦棠督隊環攻賊尙憑長牆拚拒劉松山金運昌分馬隊繞出卡後該逆返顧慌亂蕭章開劉錦棠催隊將長牆一鼓蕩平乘勝逐北追近金積堡東西各寨收隊是役東西兩路共斃賊千餘名劉松山所部生擒一百八十餘名訊出賊目馬芝堂馬三揚李朝三名一併正法弁勇受傷九十五名內記名提督楊清源胸膛受擡槍子傷甚重陣亡弁勇十七名十七日金運昌移營壓金積堡西北而壘斷該逆往來馬家灘之路馬家灘一帶向有本地回寨自官軍由固原掃蕩而北豫望城李旺堡一帶被創甘回多竄匿其中皆馬化澂新敎死黨也二十七日黎明劉松山會師進剿金運昌列隊於南劉松山列隊於西分

支迤西而東南金積堡東南步賊循牆出西北二三里各村莊悉
燬臺抗拒馬賊則由正西馳突而來提督余虎恩潘運璋周雲祥
彭緒斫朱德開都司陳宗蕃副都統雙壽馬步猛擊之馬賊卽敗
退步賊之後蕭章開劉錦棠從左右路猛進劉松山督中軍繼之
乘勢壓下立將各莊燬臺一律踏平右路敗賊跳匿莊內近二百
名經蕭章開圍殺無遺餘賊敗至波浪渠南西風起塵沙眯目乃
收隊是役總計斃賊七八百名劉松山一軍生擒八十八名內賊
目金虎馬沅哈桂清訊明均經正法官軍弁勇陣亡十八名受傷
一百零四名二十九日黎明劉松山押牲畜赴河西運薪芻自督
馬步督築新壘金積堡東逆眾傾巢突出劉松山金運昌擊敗之
斃賊三四百名三十日夜逆賊又傍金積堡西北里許加修土壘
兩座附築燬牆密開燬眼意似屏蔽賊巢十二月初一日黎明金

運昌馬步向西南進劉松山馬步向東南進金積堡步賊出西北一二里憑依礮牆抗拒馬賊向正西衝突劉松山步隊分三大支迎敵馬軍直趨正西提督曾松明軍功李雙良飛馬突陣壯士繼之悍賊紛紛墜馬向正南敗走步軍迤東而北直逼礮牆賊憑牆穩抗官軍噴筒火箭環施夾劈山礮洋槍測準轟擊賊中損折極多兇猷大挫各營乘機撲之登時將礮牆踏毀賊敗向西北傍壘回拒瞥見官軍馬隊環繞兩旁恐斷歸路狂奔金積堡西面各寨壘賊見陣賊鼠竄回巢亦棄壘飛遁兩壘一鼓下之各軍分道追至金積堡外壕而旋是役共計斃悍賊六七百有奇劉松山所部生擒一百一十餘名訊畢斬於軍前弁勇受傷一百三十二名陣亡二十五名初六夜陝回馬步千餘出金積堡東南排列提督李雲貴營前一里許意圖出巢掠食經李雲貴董福祥各營擊敗南

遁初七日午刻劉松山擒獲賊探供稱該逆越羊馬湖迤西而東出湖家堡向甘回王洪楊明兩寨索糧步賊尙屯胡家堡東南各村莊馬賊踞正東二三里距金積堡約四十餘里劉松山約金運昌整隊進擊初八日五鼓行抵胡家堡里許金運昌進右路劉松山進左路北近賊巢步賊登時驚潰官軍分途掩殺斬賊無數馬賊聞號礮聲由東面折遁西北沿黃河向馬家灘逸去初六夜及初八日之戰共斃賊六七百名斬逆目馬連一名陝回與甘回向以同類不相殘害自陝回索糧於胡家堡未得又怨其引官軍剿之也於是陝回陳林等復嗾李旺堡馬家灘早元堡等處甘回於十一夜傍黃河出西北廂集胡家堡以南向甘回馬宏芝馬雄等偪勒糧食佔踞四五寨劉松山偵知約金運昌合擊之十二日夜潛師疾起天明抵胡家堡各寨踞逆馬步三千餘眾盡擁而出金

運昌擊其右劉錦棠攻其左劉松山督中軍相機策應併力壓下賊敗歸巢各路馬步乘勝猛撲跟蹤衝入馬家寨賊三百餘名盡殲無一脫者是役各路斃賊七百有奇劉松山一軍生擒六十餘名勇丁陣亡十六名受傷八十四名陝回屢敗之餘不能分踞各寨盡附金積堡壕內外支帳列居逆眷屨錯其間外砌長牆以資屏蔽其原踞各寨馬化澗喊金積堡附近甘回踞之十九日夜三鼓金運昌率隊向金積堡西門進劉錦棠率隊向金積堡東門進劉松山出中路策應兩軍比近賊巢賊驚覺依牆列隊各營槍礮雷轟噴筒火箭齊發延燒賊帳壯士踰牆而上見賊卽砍賊敗遁壕內官軍正分途掩殺聞各寨甘回突出救援圖鈔官軍之後陶定昇易致中何作霖分兩路橫擊之援賊不支敗遁原巢官軍壓迫寨邊守寨之賊閉門拒之敗賊不得入循牆而遁壕內甘回恐

官軍乘勢擁入立將卡橋折斷陝回之墮陷壕中刺斃跌斃者無算是役斃悍賊共五六百名賊眷傷夷者無數可計劉松山所部生擒一百零七名分別斬釋弁勇陣亡七名受傷三十二名劉松山回營後令軍士備雲梯草束爲進攻之具二十一日黎明督隊抵胡家堡地方各寨步賊憑牆堡列隊馬賊分兩路衝來易致中何作霖張左右翼迎敵立斃悍騎多名馬賊縮退步賊兩旁官軍三路乘之馬賊狂遁西南步賊敗歸原寨入寨不及之賊各營四面鈔殺無遺是役斃賊三四百名生擒四十三名訊明斬之官軍弁勇陣亡十一名受傷者六十四名薄暮收隊距胡家寨二三十里安營其毗連胡家堡爲趙馬兩寨賊刃林立二十二日四鼓劉松山夜襲之督隊分數路環攻正在擲草填壕揮鋤擁進南西各寨步賊忽從趙家寨之左鈔出劉松山督各營截擊援賊敗遁追逐

里許適趙家寨中積薪爲官軍火箭所著煙燄騰空寨賊驚怖并
勇猛升而上拔之寨內踞賊焚殺殆盡各營捲旗休息更漏將殘
矣其馬家寨之賊見官軍已破趙家寨分兵合圍無路可遁亦無
援可待堅壁拒守二十三日辰刻軍士更番輪攻逾時之久寨中
子藥磚石已盡各營乘機猛撲相繼而下兩戰斃賊七百餘名陣
斬逆目馬世傳於趙家寨生擒逆目何彪於馬家寨訊明正法弁
勇陣亡二十六名受傷一百三十二名官軍收隊回金積堡詗陝
回頭目鄒保和夥甘同逆黨由韋州一帶擄糧而歸拒金積堡東
南三十餘里二十五夜劉松山約總兵張福齊徐文秀諸軍併力
攔截漏二下賊由漢伯湖踏水而過不虞官軍已分三路伏堡以
待也劉松山擂鼓發號催隊迎頭擊之該逆拋棄輜糧頓躓冰中
餘賊由張福齊徐文秀兩軍中空之地北竄經各營攔截而東五

鼓繞波浪湖出西北趨金積堡方近板橋劉松山派提督尹興茂
潘運璋截剿而前敗賊鮮有漏網總計此股竄賊馬步六七百名
除官軍擒斬衝散之外歸巢者不過數十名牲畜糧食器械俱爲
官軍所奪弁勇受傷八名其金運昌會剿詳細情形及雷正綰周
蘭亭張福齊徐文秀各軍疊次戰狀另片詳陳以清眉目再自上
年十二月初旬以後西路援賊踵至平涼固原以北至甯靈一帶
運道中梗其間土回亦有撫而復叛者兵事繁雜各軍所報戰狀
緘牘又往往中途沈失須飭從新補齋始可據以入告而彼此補
齋或遲或速未能剋期並到故此大馳報捷狀致有稍遲又奏准
雷正綰等緘稱逆回勢窮圖竄十三四至十七八等日各軍連日
堵剿獲勝其文報中途遺失未據補齋續據牘稱十二月初一日
辰刻劉松山約會出隊雷正綰馬步向金積堡西門進周蘭亭張

福齊繼之賊大股自西面分道迎敵騎賊列步隊兩旁分支伏左右廢堡中意圖鈔官軍之後時官軍已直抵二道渠賊紛紛越渠索戰提督閻定邦總兵陳義趙玉亭前總兵徐萬福副將黃有本楊美勝隊伍一鼓壓下跟追過渠賊伏起雷正綰周蘭亭張福齊調劈山礮隊排轟之賊遁歸巢各營正連環收隊騎賊復糾悍黨衝突而來總兵劉明泰周玉堂參將劉忠發知州黃立鼐同旗猛撲倂賊入壕內乘勢將各堡伏賊接殺而還是役共斃賊五六百名生擒數十名分別斬釋初六日黎明各軍整隊分三路衝進二道渠扼賊於西南各堡斬斃多名日暮收隊聞東南槍礮聲張福齊周蘭亭料賊圖南竄亟挑銳卒乘黑夜踏冰越油蔴湖馳抵漢伯堡竄賊正狂奔而南官軍截其後股掩殺二百餘名是夜二鼓賊騎步數百人竄近高州鎮總兵徐文秀營前搶越長壕各營迎

頭堵截格殺十餘名該逆奪路而遁初七日賊乘冰橋偷越廣武營雷正綰等派隊雕剿斃賊多名賊逸而西趨副將楊光龍率隊由張恩堡截出行三十里至鐵桶堡斬殿後悍賊百數十名初八九等日圍定邦周玉堂黃立鼐隊伍出廣武護糧沿途遇賊或數十人一起或百餘人一起官軍均有擒斬十六夜二鼓逆眾由漢伯堡轉糧金積堡總兵陳玉貴徐萬福黃有本潛師襲之前截後追斃賊數十名獲其輜糧騾馬而歸十七夜漏初下周蘭亭張福齊調賊騎千餘出金積堡履冰越油辣湖圍分竄東南劫糧官軍豫伏湖岸以待比賊近岸轟斃刺斃極多餘逆敗遁回巢生擒八名周蘭亭張福齊料該逆連夜負創必以官軍巡防在外將乘虛犯營壘十八夜軍中嚴守備各選壯士伏壕內俟賊至營前乃起擊之二鼓該逆大股直撲張福齊營壘踰長壕拔花籬勢甚兇猛

張福齊周蘭亭擂鼓發號督所部分左右路鈔出壕內伏兵齊起應之該逆狂奔回巢是役殺斃賊數百名生擒十二名訊明斬之十九夜三鼓張福齊調賊由楊家園莊踰漢伯堡入金積堡揮隊掩之殲斃無數餘逆折回楊家園莊官軍四鼓收隊是夜二鼓該逆數百騎過油蘇湖徐文秀派各營迎擊之斃賊二十餘名勇丁受傷三名陣亡一名二十四夜三鼓賊仍向油蘇湖偷渡徐文秀率隊截轉生擒七名二十五日逆眾由定邊擄糧池豫望韋州回金積堡各路官軍得報同時準備三鼓賊越漢伯堡經劉松山督隊擊敗趨油蘇湖北遁徐文秀所部斃賊數十名該逆仍折而東是役徐文秀所部斃賊數十名生擒九名奪其牲畜糧食據擒賊供稱此股卽陝回鄒保和所帶經官軍截擊落後茲圖歸巢訊畢斬之徐文秀於二十六夜分布防兵於油蘇湖三鼓賊至官軍併

力攔截盡斃數十名生擒十七名餘逆仍向東竄其金積堡迎護之賊又經劉松山擊敗歸巢二十七夜三鼓金積堡復出悍騎駛油蔴湖東犇徐文秀橫截之將逆眾截成兩斷此各營截剿竄回獲勝之情形也又奏記名提督金運昌所部馳抵金積堡與劉松山會師剿賊所有上年十一月節次獲勝情形臣已准劉松山來牘陳奏惟未據金運昌稟稱故戰狀不詳嗣據金運昌稟稱該軍將定邊花馬池運道部署節節分營駐守卽自率馬步各營於十月二十四日馳抵靈州築壘於城西南十餘里比因回逆正向劉松山乞撫連日按兵未動十一月初三日辰刻劉松山以陝回人眾心雜撫議無成約齊隊痛剿當率所部成列以出與金運昌會師吳忠堡午刻齊抵板橋驛見賊中馬步出金積堡附近堡寨列隊抗拒劉松山分三大支攻其東北金運昌向金積堡之西擊

賊右路總兵銜副將王化成副將邵升堂步隊列右路之左提督方廷芝參將董布亮步隊列右路之右金運昌督提督銜總兵張懷玉參將邵維常居中策應提督王鳳鳴總兵李華文馬隊出步隊左右兩路之旁稍取遠勢以作包鈔賊見官軍新樹一幟隊伍不及劉松山之多悉銳以欺其單官軍以洋槍洋礮三路排轟刀矛手連環湧進斃悍賊數十名賊陣慌亂王鳳鳴李華文等縱馬鈔殺步兵繼之追近金積堡壕邊蕩平賊巢十餘處薄暮收隊卽於金積堡正北迤西四里與劉松山聯絡爲營初四日巳刻金積堡東西兩面塵氛大起偵賊傾巢而出欲與官軍決死戰也劉松山攻其左金運昌仍攻其右先以馬隊誘戰佯爲不勝伺步賊離巢漸遠金運昌揮隊奮擊李華文王化成馬步從右路之左殺出王鳳鳴方廷芝馬步從右路之右殺出賊大潰遁入西南各巢落

後之賊斬馘殆盡少得免者各收隊還兩日之戰金運昌一軍斃賊近千生擒百數十名弁勇受傷一百九十二名參將張兆孟左膀受矛傷陣亡四十四名連日大風揚沙賊伏未動初七日劉松山會商仍分兩路出隊金運昌一軍斃賊二百餘名生擒三十餘名勇丁陣亡九名受傷四十二名初八日黎明劉松山移軍金積堡正北里許築壘金運昌列隊助之賊出馬步來撲官軍嚴陣抵禦午後營壘成軍士分途壓剿斃賊約二百名生擒十餘名勇丁陣亡八名受傷三十名初九日劉松山會合金運昌隊伍進金積堡之西回逆亦分股索戰馬賊迤西而北圖繞官軍之後金運昌派王鳳鳴領馬軍禦之輔以步隊洋槍手自督大支馬步合劉松山右路之兵將東路悍賊奮力擊敗轉旆而西策應王鳳鳴一路其時西北馬賊猶將下馬步戰軍士以全勝之勢膽氣益雄超距

而前當者辟易搏擊逾時賊紛紛上馬飛騎狂遁官軍斬其殿後
悍賊多名壓追金積堡西面寨外而還是役斃賊三四百名受槍
斃傷者約六七百名生擒七十餘名勇丁陣亡三十二名受傷百
四十名總兵郭占榮躍馬當先面被矛刺手中斃傷副將李占標
驍勇突陣左肱受矛傷穿透左股中飛礮子是日以後至十六日
金運昌一軍捷狀臣已於劉松山摺內兩次略陳大概其稟報尙
未到營想係郵遞遺失已飭補齎前來再行詳報嗣金運昌以賊
勢蹙而仍悍疊次交鋒騎賊慣用步戰與官軍短兵相接所部步
隊五營扼駐正北而金積堡西門一路該逆尙能出入樵採因將
甯條梁安邊定邊各營移赴前敵以厚兵力分屯金積堡西北而
壘二十七日黎明金運昌馬步出正南與劉松山西路隊伍互爲
犄角王鳳鳴馬軍迤南而東以分東路賊勢金運昌揮隊向南猛

進賊千餘悍黨迎敵張黨玉王化成方廷芝三面鈔擊之該逆敗遁西路王鳳鳴隊伍自東緊躡其後劉松山隊伍自西攔截於前敗賊冒死趨波浪渠見官軍因風勢漸緊按隊未追復憑渠抗拒相持許久風漸定邵升堂挑壯士數十名挺長矛從左路越渠猛刺賊驚潰右路之賊亦經劉松山擊敗各路躡近賊巢始行收隊二十九日金運昌步隊列營壘左右挑戰賊堅壁未出已刻金運昌聞南路礮轟雷震知劉松山已出隊擊賊督馬勇疾馳東路夾道衝出賊駭而奔官軍分道追之斬馘甚夥初一日劉松山會金運昌仍分東西兩路擊賊金運昌見賊之精悍麤聚於西東面賊勢稍弱分小支隊伍牽綴之挑馬步大隊併力與劉松山全部排山而進將西面賊壘礮臺一律踏毀殺至金積堡外壕而還二十七二十九至初一日三次之戰金運昌一軍斃賊八九百名生擒

百餘名此金運昌會合劉松山連日剿回獲勝之情形也 上諭

軍機大臣等左宗棠奏賊蹤紛竄見籌剿辦情形並自請嚴議暨請飭定安等撥濟劉松山等軍食各摺片所陳金積堡回逆經官軍痛剿後竄走黑城半角城等處提督丁賢發於石峽口敗之其由環慶竄出各股亦經副將蕭玉元等軍先後擊敗惟前據劉典馳奏逆回竄擾陝境及昨日李鶴年李宗羲所報邊馬已至大荔羌白潘驛等處各情是賊蹤之紛竄陝疆者股數不一且自西迄東到處蔓延左宗棠督師西向未能將後路嚴密布置致全陝肅清之地復遭蹂躪實屬咎無可辭左宗棠著交部嚴加議處劉典雖因畱防兵少堵禦不及而於所轄地方並不先事圖維致令賊蹤竄入亦著交部議處見在咸陽涇陽一帶徧地皆賊陝垣得以拒賊者僅恃一綫渭河兼之密邇晉豫防剿甚爲緊急左宗棠所

派李輝武一軍兵力尙單著卽添撥勁旅星馳入陝會同劉典所
派各軍合力剿擊淨埽賊氛儻該大臣等觀望遷延任令賊匪縱
橫掣動全局則該大臣等自取咎戾朝廷亦不能曲加寬貸也劉
松山金運昌兩軍圍攻金積堡踞匪見正得手所有該兩軍軍食
自應迅籌撥濟以資飽騰定安金順素顧大局無論如何爲難務
須代辦糧米駝隻設法接濟俾免匱乏之虞是爲至要將此由六
百里各諭令知之○左宗棠奏金積堡逆回經諸軍疊次痛剿勢
極衰蹙逆回計無所出惟恃句引援賊阻截官軍糧運冀解重圍
以爲救生之計上臘崔三禹得彥馬生彥白彥虎諸逆由狄道北
援金積堡疊經官軍痛剿死傷極多狼狽歸巢馬化隆猶不知也
怪崔逆等久不赴援又遣其同教靖遠馬龔子虎偏額子等央其
妻弟臨洮大師謝四及崔山等急赴金積之援上臘二十八日西

山各良回報河州大股逆回步騎數千突至而安州一帶臣飛飭
半角城黑城子李旺堡固原州瓦亭各營嚴防一面調陝安道黃
鼎率所部馬步各營剿之正月初四日黃鼎率名營自瓦亭進駐
固原州初八日賊騎竄由黑城半角城中閒山徑出大路撲犯提
督丁賢發營壘丁賢發飛飭右營副將楊正華由高崖山邊截剿
自率親兵從大路迎頭截擊賊欺官軍隊伍甚單三路擁出峽口
悉力來撲丁賢發率親兵力戰穿入賊陣縱橫盪決賊不能支斂
眾退入石峽口丁賢發令楊正華等從左右縱擊之賊陣遂亂一
紅衣逆酋挺矛縱馬而來喊諸賊轉鬪丁賢發策馬馳及立將逆
酋刺傷而奪其馬賊眾擁逆酋向石峽口而去石峽口山徑仄狹
騎賊祇能魚貫不能雁行丁賢發飭排開槍礮轟之賊死傷相繼
棄馬上山弁勇爭先奮擊鏖戰至酉刻始收隊而還是役以寡擊

眾以步敵騎斃賊數百名生擒悍賊四十餘名官軍陣亡者六十九名受傷者九十五名蓋亦血戰矣據生擒賊供該逆圖繞東山向豫望城韋州以竄金積堡北黃鼎護運各營趕到則賊已遠遁乃飛報金積堡各軍嚴密戒備以待其由金積堡竄出環慶一路擾截糧運者約有兩大支頭起爲甘回馬升明陝回海萬新等二起爲陝回藍明秦馬正剛等漢回雜湊計人馬約二千內外號稱四五千上臘十七日賊騎百餘攻環縣之大柴溝民堡副將蕭玉元救之十八日遇賊大柴溝南二十餘里蕭玉元揮隊迎擊追近大柴溝殺賊數十奪獲馬十餘匹生擒回逆劉有明馬明連訊供係上臘初五日由金積堡竄出之賊小頭目爲陝回劉得元二十一日復探各股麇至環縣之二十里鋪是夜四鼓蕭玉元率親兵及前左兩哨列於河下知縣羅壽昌率右後兩哨由山上壓剿而

下蕭玉元望見山上之隊齊抵山揮隊急進殺賊十餘名賊卽卻退羅壽昌率山上之隊馳擊而下彼此會合猛進斃賊五百餘名生擒三十五名訊據生擒賊供甘回頭目馬升明陝回頭目劉得元海萬新均經陣斬二十六日戌刻調縣境馬房川又有賊蹤羅壽昌等馳至賊卽上山逃遁躡蹤追殺二十餘名餘賊乞降羅壽昌驗其器械衣服或有或無挾之以歸訊知卽前次擊敗餘賊也內有逆回二十一名斬之而馬升明海萬新等一支已紛紛散竄不復成股其餘黨之無歸者仍結夥分途四竄十二月二十九日署慶陽府知府謝大舒調郡北東川地方有賊竄至商之署慶陽營遊擊李奪魁挑選畱防勇丁及親兵團勇共一百三十名伏於賈家橋適報騎賊已抵旋馬灣相距僅十五里李奪魁急進掩之初一日辰刻馳抵月樂地方守備張金明參將宋南山千總程炳

順先以三騎誘賊賊千餘競起逐之忽李奪魁督隊齊至立刃十餘賊各竄洞賊黨擁而至李奪魁背山據險整隊奮擊賊多死傷一黃襖賊目中槍而斃賊勢大潰李奪魁追擊十餘里至澇池掌柔遠川賊遠遁黃頂山始收隊而還計斃賊百餘名是時合道川一帶警報頻傳初二日蕭玉元出隊本鉢城遇賊騎數百突至其地寬平如掌無險可扼乃結方陣禦之相持三時不決賊騎亦不敢近偏薄暮收隊而回是夜蕭玉元羅壽昌分三路設伏於張家灣合道城河及川西各處三更賊果大至五品軍功鄧紹禹於賊騎過半時橫截而出槍礮分別排擊昏黑之中賊不辨官軍多少後股騎賊向東北奔竄前股千餘爲合道城河及川西伏兵截住各弁勇奮力衝殺將賊截爲兩斷黎明賊分向合道城河下竄官軍奮威衝殺斃賊人馬二百有餘生擒三十八名敗賊向安家掌

一路飛遁初三日追剿上竄之賊至環縣探賊由肅遠溝竄去其
下竄之賊亦由毛家溝竄去初五日李奪魁商同總兵戴佑勝等
趨東川邀擊之行抵白家甸訶知賊竄過迤東十里住窩洞十餘
處初六日寅刻分三路進攻賊甫驚覺恟懼思遁官軍急擊之斬
賊數十名其前數窩之賊百餘名策馬翻山而竄官軍躡蹤窮追
二十里沿途均有擒斬計共斃賊百餘名生擒十三名署平慶涇
道魏光燾所畱鎮原按剿竄匪之總兵夏奉朝及提督甘大有連
日於鎮原之張高鎮計家大岔鎮原固原交界之海巴子川一帶
按剿竄逆計共斃賊約近百名生擒十四名初六日魏光燾馳回
慶陽接據各路稟報合道川截斷一支北竄之賊又將下竄而白
家甸擊敗之賊已由合水邠州交界之蒿水鋪竄向固城當卽飛
緘提督劉端冕所部前後兩營分途兜剿飭參將魏紀銓率隊出

西華池南義井向甯州正甯一帶截之初九日卯刻夏奉朝赴慶陽一面派馬勇赴黑水河一帶偵探中途遇逆回十餘名當卽追殺生擒五名訊知陝回馬正剛帶陳瞎子馬祥順沙學德等賊黨二千餘由金積堡竄至惠安堡掠取食鹽遣千餘賊裹送金積堡自帶千餘人由惠安堡韋州堡下馬關豫望城並三岔河而來騎賊因馬倒落後者多初八日三更由三岔河竄西峯鎮蕭金鎮幫帶馬隊參將譚吉士訊知前情未刻率隊追至蕭金鎮當卽飛隊攻擊立斃悍賊十餘名賊四路衝至將馬隊圍住譚吉士督隊衝殺突圍而出仍回關十餘合賊始敗退計陣亡馬勇三名受傷八名初十日夏奉朝回營十一日率隊追至蕭金鎮賊已於是日竄甯州十二日拔隊甯州則賊已由正甯竄入陝境三水矣其竄陝以後情形已由署撫臣馳報竊維由金積堡竄陝之賊定邊甯條

梁竄入者據各路馳報數約三千由環慶竄入者兩支約二千餘環縣慶陽各營初八日以前所剿敗者其前股也人飢馬乏遇官軍則敗見已埽滅殆盡陝回馬正剛一股稍悍前竄入陝境者實不滿千頃據魏光燾稟十一夜溫橋夜襲賊館斃賊二十名生擒十二名無一脫者十七日太平鎮擊逆目藍明泰一起斬殺四十餘名生擒四名餘賊向三岔河遁去當卽馬正剛之黨未能合隊者臣聞馬正剛一股將闌入陝境十四日卽調漢中鎮總兵李輝武駐寶雞兩營赴乾州限於十九日到乾派總兵殷華廷率精騎百名輔之將以扼口子頭之要也嗣賊已由口子頭竄出復飭李輝武續調兩營繼進而飭周開錫以吳士邁宗岳兩營填紮其壘李輝武殷華廷馬步皆能戰檄歸署撫臣就近調遣自可得力惟延綏一帶兵力甚單前奏請飭山西撫臣於冰橋消化後催令郭

寶昌渡河而西肅清劉松山金運昌兩軍餉道如蒙俞允庶於大局有裨至臣統籌全局未能先事豫防致逆回得以乘隙入陝擾及完善咎無可辭應請旨將臣交部嚴加議處以明軍律上諭

左宗棠奏彙報北路官軍剿賊疊勝暨金運昌雷正綰等軍獲勝情形各摺片陝西逆目陳林等折竄金積堡負嵎抗拒經劉松山會合金運昌等軍於上年十一月十二月間疊次獲勝攻破寨壘賊鋒大挫著左宗棠嚴飭劉松山會同各軍將該逆悉數殄除毋任漏網金運昌雷正綰等軍均係會攻金積堡之師見在逆回乘虛肆竄陝境著左宗棠嚴飭該員等將金積堡賊匪迅速掃除以便分兵追剿毋爲該逆牽掣將此由六百里諭令知之○左宗棠奏平原之固原涇州之鎮原慶陽之環州壤地相連周千餘里其近固原東境者俗呼東山收復以後招輯災黎安撫夏回散販壘

荒粗有頭緒而地形遼遠山勢叢雜兵燹之後人物彫殘回土各匪乘閒出沒聚散靡常伺便劫殺自陝西提督雷正綰提督周蘭亭總兵張福齊徐文秀各軍前進金積堡西南秦渠一帶臣比飭提督周紹濂率所部五營分布固原以北之黑城子李旺堡半角城副將桂錫楨扼四百戶提督丁賢發自鎮原出固原道員魏光燾提督劉端冕由慶陽合水步步前進遙爲犄角清後路游匪護中路轉輸爲控制北路之計上年十月二十二日回民王萬益報賊騎擾及半角城三十里之西陶家維時桂錫楨在半角城聞信急督馬隊掩之斬殺六七十騎餘逆倉皇敗遁訊據賊供逆目明先行卽明七十子噉逆回馬子英馬新明馬升老等千餘騎自固原東北之下馬關竄來圖截官軍糧道訊畢斬於軍前收隊回防訶該逆嘯聚殘黨折竄西陶家復圖抗拒周紹濂派總兵張大雄

自李旺堡擊其東桂錫楨馬隊自半角城擊其西二十三日四鼓各營乘月色微茫銜枚急進齊抵西陶家逆騎方排山口而陣瞥見官軍馬步兩路衝殺直前賊卽越澗翻山紛紛鼠竄官軍乘勢鈔擊斃賊二千餘名帶刀矛槍毆傷者無算收隊回馬家壩子山谷中橫出悍賊百餘騎張大雄嚴陣猛撲斬馘十餘名該逆仍奪路東竄二十三日魏光燾率隊抵環縣二十四日黎明訶逆騎夜襲環縣迤北六十里之紅德城比督隊馳救賊已向西川一路遁去魏光燾揮軍緊蹙二十里及尾賊百餘正牽牛驢緣峻坂而上下臨環水提督左日升總兵夏奉朝率馬步隊斜出山右搶過賊前魏光燾督各營從後蹙之該逆自相蹂踐官軍乘而殲之其跳崖梟水得脫者十數賊而已收隊回紅德城休息以奪獲賊中糧畜散給堡民二十六日進紅德城六十里之山城地方沿途乏水

士卒負冰以行二十七日直抵萌城已去慶陽四百一十里去環縣二百餘里矣魏光燾正揮隊圍攻該寨指索擾害紅德城之賊回目羅復章馬柏森等出寨羅拜訴日前竄擾紅德城賊目係明七十子架名萌城實則萌城良回未豫逆謀且願備馬械聽候調遣維時豫望城已撫回目馬添發黑城子把總馬文昭亦來具保萌城良回永無反覆魏光燾察其情詞真切慰諭之率師由紅德城回慶陽忽接署鎮原縣知縣廖溥明報明七十子一股又竄至固原東北喉元城子三角城土回海生春馬正榮海滿相等出白家壩關堡臺攻掠鎮原縣東北姜家扒堡固原古城川鎮原南山洞土匪亦乘間竊發臣比飭參將劉錦臣參將馮南斌橫出鎮固之交節節接獲魏光燾自環縣而西丁賢發自固原而東兩路鈔截該逆伺官軍分道掩至循環固鎮交界之三岔地方宵遁元

城子盧家灣可北趨豫望韋州以達金積堡魏光燾先期約劉端冕分派隊伍合力擣巢十五日官軍先後出抵三岔道出三角城派候選州判朱寶常都司龔福祥彭桂馥千總李松泉誘擒土匪頭目吳成章斬之十七日行八十里止馬家河距賊巢六十里魏光燾傳令各營潛師夜起出其不意提督甘大有參將譚楚光由左路進攻盧家灣左日升步隊繼之魏光燾親率參將于維槐夏奉朝馬步由右路進攻元城子知縣范廷樑副之十八日五鼓抵白家灣近元城子土窯鱗次逆眾翕聚其間不虞官軍之驟至也比各營搥鼓發號齊進該逆倉皇出窯向元城子狂竄魏光燾催隊緊躡甫近元城子土城城上角螺齊鳴賊眾馬步千餘開城迎敵白家灣敗逆亦回顧吶喊而來魏光燾分支以應援賊自督步隊緊結方陣橫擣中堅馬隊張兩翼而進夏奉朝于維槐策馬衝

突立斬悍賊十餘名賊眾大敗有飛馬東奔者有折回土城者官軍蹣跚猛擊立將元城子及附近之磚城子楊圪等堡掃蕩一空追至白家塬適甘大有譚楚光亦將盧家灣沈家莊各處賊巢掃蕩來會賊分道狂奔一西竄白家壩一北竄豫望城官軍仍收隊回元城子計是役共斃賊五百餘名生擒回目海生春之兄海生獻及餘黨六十餘名分別斬釋拔出男婦老弱難民三百餘名官軍勇丁陣亡十餘名方魏光燾之會師擣巢也丁賢發已率所部出固原之古城川大石溝搜剿土匪十九日越大石溝近關堡臺偵賊數百自白家壩竄來官軍豫伏山側伺賊近前揮隊奮擊陣斬十餘名墮崖落澗者二三十名餘逆越山狂遁不復成列生擒馬福有馬正海閔起費海恭起海金江收隊回關堡臺忽謀報明七十子敗黨復由豫望竄距元城子迤西五十里之道蓮寺馬得

中零騎逃逸望南界下河川距驛馬關不遠二十一日魏光燾挑壯士乘月夜襲道蓮之賊四鼓抵賊巢甘大有夏奉朝瞥見窰內火光閃爍知賊踞其中下馬挺矛首先殺入勇士繼之擒斬極多零星逸出者不過二十餘騎擒逆目苟幹臺供明先行帶千餘騎於二十日早過道蓮寺不知去向訊畢斬之二十三日魏光燾分營扼驛馬關會同畱防各營偵緝殘匪自率馬步進白家壩良回楊如雨迎候道側稱海生春數創之後懾伏兵威見距此不遠求准其收撫貸其一死魏光燾卽以楊如雨爲嚮導派副將舒萬勝都司范潮海單騎前往提海生春及其眷屬到營訊係被明七子逼脅入夥實非甘心從逆魏光燾勒限悉繳馬械捆獻要犯贖罪隨據海生春率同馬得中劉文興海滿和海維海江等款營待罪呈繳戰馬八十四軍械六十件楊如雨亦具連坐甘結保其永

不滋事魏光燾比將海生春等交楊如雨管押以其餘眾八百餘口安置白家壩附近地方請示前來臣查固原東山土回種落繁衍門戶各別回眾中自相推擇有總事有頭目北五營總事卽楊如雨丁有旺副之東四營總事海生春頭目則海滿和海起舞馬三科海義泗也南五營總事馬得中刻文興二人明先行卽明七子馬正榮馬興貴穆仲元皆頭目也楊如雨本屬良回海生春馬得中等向與穆仲元同居固原州城上年八月內被陝回襲脅出城逃竄元城子三角城一帶此次明先行劫眾跳梁海生春等尙知及早歸順情有可原當發去良民門牌交魏光燾轉給該降回子其自新以昭朝廷寬大之德同時固原州城守營千總陸希正緝獲逆目馬歲兒子海苟苟子各犯由丁賢發派游擊黃義勝押解臣營訊係糾黨在平涼安國鎮劫殺者斬之在逃之著名首

惡明先行卽明七十子剡仲祿海彥虎海興和海揚昌海上玉馬如意明集成馬占全馬正榮等仍勒限海生春捆獻丁賢發陣擒在押之馬福有等五犯已飭分別斬釋此官軍辦理固原東山土回剿撫兼施之大概也鎮固土匪自安家山寨惠常魁孫家窩孫百萬等伏誅之後續據代理鎮原知縣廖溥明鎮原千總劉定洲擊解鎮原匪目惠文魁固原匪目黃登舉到營訊係疊攻民堡要犯斬之嗣十一月十四日劉錦臣馮南斌道出鎮原向南山洞搜捕而進協同廖溥明劉定洲都司劉虎臣購綫擒何秀義何秀儒何世落到案代理平涼知縣畱陝府經歷縣丞王啟春亦先後弋獲扈尙勤蘇老五雷益發各犯皆籍隸固原其平涼之杜大福張文緒二犯亦經王啟春緝獲臣按名提訊均積年劫眾攻堡肆行殺掠巨惡扈尙勤曾攻破華亭縣城杜大福張文緒入平涼城戕

善城守營外委孟姓邊姓擄佔其妻均經分別斬梟傳首犯事地方以伸國法而快人心報聞○予甘肅陣亡提督張四維等祭葬世職○是月蠲免兩浙仁和等六場荒蕪地錢糧蠲緩兩浙錢清等五場被災新舊竈課錢糧陝西華州等五十七州縣被擾舊欠額賦江西義甯等三十五廳縣暨九江府同知所屬被水被旱新舊額賦雜課緩徵山東濟甯等三十八州縣德州等四衛暨東平所永阜場被水被旱被風被雹被蟲本年上半年忙額賦雜課展緩直隸開州等五十八州縣被水被旱被雹被風新舊額賦租課